

Tēnā koutou e ngā Mātua

I tēnei tau e whai ana tō tamaiti i tētahi mahi whakaihiihi - te ako ki te pānui. I roto i a mātou mahi whakaako, e whakamahia ana ngā rauemi a Wendy Pye Publishing, kua 40 tau rātou e whakaputa rauemi ana mō te reo matatini mā ngā tamariki, hei āwhina i ngā ākonga maha o tēnā whakatipuranga, o tēnā whakatipuranga. Kei roto i tēnei reta ētahi kōrero mō tā mātou tikanga whakaako i te reo matatini, ā, me pēhea koe e whai wāhi mai ai.

Me pēhea tā mātou whakaako i tō tamaiti ki te pānui?

E whakamahi ana mātou i tētahi ara whakaako weteoro kōtuitui whai taunaki hei tikanga ako ki te pānui. Ko te tikanga o tēnei, ka whai raupapatanga, pūnaha hoki te ako a tō tamaiti ki ngā pūkenga oromotu. Ka ako ia i ngā oro 44 o te reo Pākehā me ngā pū e whakaatu ana i aua oro. I a ia e ako ana i ngā oro me ngā pū hou, ka whakamahia e ia tēnei mātauranga mā te pānui i ngā pukapuka pārekareka e kīia ana ko ngā 'pukapuka weteoro'.

He aha te pukapuka weteoro?

Kei roto i ngā pukapuka weteoro ko ngā kupu anake e taea ana e ngā tamariki te pānui mā te whakamahi i ngā pūkenga kua ākona ki a rātou. Hei tauira, ko te huinga pukapuka tuatahi ka pānuitia e ngā tamariki (i roto i te hōtaka), e whai ana i te hiahia kia mōhio anake ki ngā oro mō ngā pū **s a t p i n m d**. Kei roto i ngā pukapuka ko ngā kupu e whai ana i ēnei oro (hāunga ētahi kupu uaua - arā ko ngā kupu e hiahiatia ana ki ngā pukapuka katoa ahakoa he uaua te whakahua motumotu i tēnei wā, hei tauira, *the*). Mō te huinga pukapuka tuarua, ka ako ngā tamariki i ngā oro mō ngā pū **g o b h e r f u l**. Ka pēnei tonu kia ako rā anō i ngā oro 44, me te whakaharatau haere i tō rātou mātauranga oromotu hou. I ngā tamariki e piki ake ana ki taumata anō o te hōtaka, ka ako rātou ki ngā tātaki rerekē mō ngā oro kua ākona kētia e rātou.



Ā mātou pukapuka - Ko Sam, ko Dan, ko Nat

E whakaako ana mātou i te reo matatini mā te hōtaka Sunshine Phonics Decodable. E whai ana ngā pukapuka tuatahi o tēnei hōtaka i tētahi whānau me ngā tamariki tokotoru - a Sam, a Dan, a Nat - me ā rātou mōkai, tō rātou whānau, me ō rātou hoa paekiritata.

I te mea he ōrite ngā kiripuaki i ia pukapuka, ka mōhio ngā tamariki ki a rātou, ā, ka rikarika ki te pānui mō ā rātou mahi mātātoa. He pārekareka ngā pikitia o ngā pukapuka ā Sunshine Phonics Decodable, ka waia hoki ngā tamariki ki ngā āhuatanga me ngā mahi ō roto. Ko te mea nui, ko ngā kōrero pārekareka, he pukuhohe te whakamutunga o te nuinga, e taea ana te pānui mā te mātauranga oromotu kua ākona kē ki ngā tamariki, ā, ko te tikanga kua kore e mate ki te matapae i ngā kupu. Mā tēnei e whakarite ka angitu te pānui a ia kaipānui tauhou mai i tā rātou pukapuka tuatahi.




Me pēhea koe e tautoko i tō tamaiti?

Ka hari tō tamaiti i ētahi pukapuka hei pānui ki te kāinga. Ka whakaharatau ia pukapuka i ngā pū me ngā oro kua ākona i te kura. Anei ētahi whakaaro mō te tautoko i tō tamaiti ki roto i ngā mahi pānui.



Ka taea pea e koe te:


- Huri ki te whārangi whakamutunga o te pukapuka - kei reira ētahi tohutohu hei kōrerorero i mua i te pānui i te pukapuka, i muri hoki.
- Huri ki te uhi o mua o te pukapuka - e whakaaturia ana i reira ngā oro e ākona ana e tō tamaiti ināiane. Me whakaharatau ki te whakahua i ngā oro ki te taha o tō tamaiti, me te tohu ki te pū. Me whakaharatau ki te pānui i ngā kupu aronga kua whakarārangitia - me pānui tonu tō tamaiti i ngā kupu mēnā e taea ana. Ki te kore, me whakahua i ia oro, ka whakakotahihia ngā oro ki te hanga i te kupu.
- **Ngā kupu uaua** - kei te uhi o mua o te pukapuka ka kitea ētahi kupu uaua e rārangihia ana. He kupu ēnei e hiahiatia ana hei hanga kōrero (hei tauira, *to, is, the, go*) engari kāore anō tō tamaiti kia mōhio ki te whakahua motumotu i ēnei mā te mātauranga oromotu e mōhiohia ana e rātou. Pānuitia ēnei kupu ki tō tamaiti me te tono i a ia ki te whakahua anō i ēnei kupu ki a koe. Me pānui pea koe i ēnei kupu ki tō tamaiti ina tae ki aua kupu i roto i te pukapuka.
- Me pānui tō tamaiti i te pukapuka ki a koe. Mēnā he uaua tētahi kupu ki a ia, me akiaki i a ia ki te whakahua motumotu i ia oro, me te whakakotahi i ngā oro hei pānui i te kupu. Me tono i a ia ki te tohu ki ia kupu i a ia e pānui ana.
- Me kōrero mō te pakiwaitara i muri mai - ka pātaihia he aha ngā mea i puta i roto i te pakiwaitara, ā, he aha i pērā ai. He wāhanga nui te aroā o te ako ki te pānui me te pārekareka o te pānui.
- Ka taea e koe te kutikuti i ngā kiripuaki o te pukapuka i te whārangi whakamutunga o tēnei reta me te whakamahi me tō tamaiti hei kōrero anō i te pakiwaitara me te hanga kōrero hou.
- Pānuitia ētahi atu pukapuka ki tō tamaiti, ā, me whai ki te whakarite i tētahi hātepe pārekareka.



E whakapono ana mātou, ahakoa he tukanga tuatini te pānui, ehara i te mea me pērā rawa te whakaako ki te pānui. E mātua whakarite ana te tikanga nahanaha o te hōtaka o Sunshine Phonics Decodable ka angitu te pānui a ia kaipānui tauhou mai i te pānuitanga o tā rātou pukapuka tuatahi! Ko te tūmanako ka pārekareka ki tō tamaiti te ako ki te pānui me Sam rātou ko Dan, ko Nat me ō rātou hoa katoa.

Tēnā tukuna mai ā koutou pātai mō tō mātou kaupapa reo matatini. Ngā mihi,







Dad



Mum



Dan



Sam




Gus



Pam



Sid



Nat